

帶

經

堂

集

嘗論中山公子牟身在江海之上心居魏闕之下

所謂少陵一飯不忘者也而猶懷英登太行反顧

見白雲孤飛謂左右曰吾親舍其下瞻悵久之雲

移乃得去則又四牡詩人豈不懷歸之旨若是乎

異趣殊情不可同年而語而不知君父之慕忠孝

之忱其致一也新城先生元蠶尾集二卷自敘以爲

康熙甲子冬奉朝命往祀南海過東平遙望數

巔隱見於烟波滅沒中迫王程不得詳用取名此

集以寓其夢想之思論者謂先生泊於宦途聲利

不擗於念匪獨浮湛外寥時勝踐名區翛然孤寄

即當荷特知膺榮遇歟歷形庭青瑣之班而謝公  
寢處自有山澤間儀元規之風範獨存丘壑也集  
名蠶尾殆與漁洋諸集命名略同商丘宋公因以  
黃魯直自號山谷涪翁為比不可謂非知先生者  
而猶不盡此也竊考先生使粵還朝念封公祭酒  
府君年垂暮乞假遄歸乃請急之日即封公捐館  
之辰相距止十日不及見終天之痛逾深摩杪手  
澤號泣松楸新阡寫哀一篇淒其欲絕瞻雲之歎  
百倍懷英由是故園榦梓將有終焉之志茹紫芝  
於商額薦春蔬於鄉國其見於先後懷人之什家

評之章往三致意焉第以

主眷便蕃難遂初服服旣闋旋赴  
關廷未幾南臺執法西樞握兵公望公才益與經國之文章聲  
名並峻身在魏闕正不敢以心居江海任達鳴高  
夫子述卿士大夫之行曰夙夜匪懈以事一人又  
曰夙興夜寐無忝爾所生如先生者不亦忠孝兼  
備而君父交致其誠也哉然則先生之詩謂之四  
牡懷歸之詩可也謂之少陵一飯不忘之詩亦可  
也余故舉名集之義而推原其說俾後之學者油  
然有所興感焉程哲拜識壬辰元巳日

自序

兗鄆之境多湖陂而小洞庭最著湖之左有蠶尾山焉唐天寶十二載太守蘇源明謙五太守於此作歌曰小洞庭兮牢方舟風嫋嫋兮離平流牢方舟子小洞庭雲微微兮連絕陘仍瀾壯兮緬以沒重巖轉兮超以忽又歌曰月澄凝兮明空波星磊落兮耿秋河歌詞旣古質類漢人語而其湖山之勝又曠邈靚麗能使臨汎者彷徨登眺者遲夷怊悵而忘返於是小洞庭之名與源明之詩並傳圖牒令狐氏之言足徵也康熙甲子冬予奉朝命

往祀南海過東平會大雪連日夜遙望湖中天水  
相際有數巔隱現於煙靄滅沒之間者土人指似  
曰此蠶尾山也時風雪寒沴又迫王程不得往旣  
南行數千里猶時時夢見之昔韓退之嘗作鄆州  
溪堂詩盛稱其蒲蓮葦蘆芡龜魚之產予卒卒  
未暇問溪堂所在度其勝未必及此湖而源明之  
歌詩直駕退之而上予稱鄆之山水獨在此不在此  
彼蓋亦未可以爲過也予家濟南所居在長白之  
麓錦秋湖之陰距鄆五百里予方備員於朝即  
舊隱數椽未能退而偃息乎其間豈暇謀及數百

里之外私其名勝使爲吾有哉亦聊以寄吾懷焉而已偶次甲子使粵以前及丁卯以後詩庚午以後雜文稍成卷帙遂以蠶尾名集而又書其命名之意以喻吾懷焉漁洋山人王士禛序

原序

古今詩人莫不以李杜爲絕詣矣。李杜而外無有相雄峙者乎？曰：曷爲而無也？退之子瞻後李杜而詣其極者也。然則退之子瞻襲李杜爲之乎？曰：前乎有李杜焉，後乎復一李一杜，則不得爲絕詣矣。李之與杜固不相襲者也。退之學李杜而非李杜也。子瞻學李杜尤學退之而究非李杜亦非退之也。李杜之作漢魏以來詩人之總萃得乎風雅之傳之正者昌黎則加恢奇焉，排奡焉而一變矣；至于子瞻則加贍博焉，整比焉以恣行其奇奡者而又

一變矣然其歸要于禮義其用使人各得其情性  
則亦猶之正而已矣此四君子之所以各詣其極  
而更數百年以來未有起而配之者也然如有起  
而配之者將爲李爲杜爲退之子瞻以肖其形模  
乎抑又有別異于四君子者也我師新城王先生  
以詩名海內者四十年自縉紳先生下至縫掖士  
言詩者必歸之先生聞焉而慕見焉而悅自度其  
力之必不能至焉而服爭相趨而師尊之極一世  
之宗工秀人無異詞或以爲太白子美或以爲退  
之子瞻固皆擬之而得其倫矣然而先生實不爲

李爲杜爲退之子瞻者其澄淡簡遠者得之二謝  
淵明王孟韋柳其舒和高暢者得之何劉鮑照沈  
宋王昌齡李頎錢起之徒其抑揚道壯得之子建  
公幹子昂達夫常建杜牧之諸人其風容色澤亦  
間而爲徐庾溫李而時時出其力與太白子美退  
之子瞻馳騁角逐則不見其毫釐分寸之不迨焉  
至由四君子而下數之如放翁石湖趙閑閑元遺  
山高季迪李西崖世皆號爲詩人之宗者以視先  
生抑亦莫之及也學者以先生追配太白子美退  
之子瞻固有不相同而相雄峙者乎夫歷唐宋以

來千有餘年之間止此四君子挾輶而起而他皆不得而頡頏焉何造物者之生才若是其難也然以四君子之魁壘傑出各極其才之所造而不可齊以一致先生起而配之更有以自別于其間何造物者之生才又若是其奇也然後知豪傑之士能自拔于千古者雖極其所傾心而學之之人未有肯一襲其陳迹而爲之者也先生漁洋前後集及蜀道南海集之刻學者幾于家有其書矣復次其乙丑以來之詩爲二卷謂之蠶尾集先生曰我少壯時歲得詩不下三百首今十年之中而所作

正是子其爲我序之雲章嘗見向之爲詩者人盡  
曰我師盛唐而規摹聲響汨喪性靈已甚自有先  
生之詩唐人之真面目乃出而又上推漢魏下究極  
于宋元明以博其旨趣而發其固蔽以迄于今海  
內才人輩出則又往往自放于矩矱以張皇謫詭  
爲工滔滔而莫之反先生近年遂多爲淡泊之音  
以禁其囂囂無益者雖向之所作極其意所欲言  
未嘗一語有溢于情性禮義而今尤範以性情禮  
義之正使之自唐而遡之以不遠于風雅之傳亦  
猶之窮河源者必返之崑崙星宿泝江流者必返

之沃焦羊膊此則先生茲集之微意歟雲章不敏所謂不造其堂不躋其戩者然以太學弟子從先生遊有年矣前之所言乃天下所共見于先生非自雲章發之也後之所言則先生以詩立教之旨而是集之刻尤願與世之同志潛思而知本也哉其曰蠶尾集取之東平之山在小洞庭河中者唐蘇源明宴遊詩序有左拂蠶尾之言而先生詩亦有云積雪明蠶尾浮雲下洞庭者可以想見其處云嘉定丙午生張雲章謹序

帶經堂集卷五十三

歙門人程薦校編

新城王士禛贊

死蠶尾詩一

送湯荆峴學士改中丞巡撫江南

論文六載西清直公望公才衆不如節鉞忽承  
天子命經綸正賴古人書帆檣萬斛勞搜粟水旱  
三吳急賜租會見飛章達民瘼何須鄉夢戀樵漁

過丁香院訪張杞園不遇題壁

吟遙長廊取次行主人不見綠苔生蜂聲滿院日  
卓午花氣撲簾春晝晴

題景州閨遊詩卷

獨持懷古意去謁武夷君九曲無人到千峰盡白  
雲鴻飛天外遠鸞嘯月中聞一與曾孫別人間又  
夕曛

爲門人朱悔人題王叔楚畫竹卷二首

小竹山人寫叢竹渭川千畝起毫端愛渠低亞清  
溪水幾個橫斜拂釣竿

茅齋青壁幾年成溪路無人略約橫一夜春雷動  
崖谷四山風雨籜龍驚

甲子暮春邀修來幼華升六千仞伸符天章

悔人過聖果寺看桃花二絕句

古寺尋春已後期東風猶爲絳桃遲禪扉靜掩殘春雨細逐茶煙飄鬢絲

章華宮裏細腰身移入招提又幾春一樹夭斜忒無賴也須著莫白頭人

題門人汪舟次乘風破浪圖四首

海外真看大九州青天一髮是琉球人間奇觀君知否萬里滄溟萬斛舟

扶桑東望海天孤虎節龍章擁萬夫正是水犀酣戰日樓船十道下彭湖

百靈不散石郵閑親見神魚跋浪間青史他年詫  
奇事天風三日到中山

竹冊親頒異姓王歸來封事動明光儘教乞與丹  
青手寫作靈槎著日傍

將乞假歸省批家書尾示兒涑

樗散無能合乞身歸來不擬負青春池東添箇垂  
楊樹要看飛花點白蘋

訪賓公大谷山居

春原麥爭秀斜日雉交飛澗水寒猶淺村煙望不  
稀田家驅犢返仄徑負樵歸想見南牕下看山杜

德機

柳菴同賓公寶菴作

西巖古寺隱谺  
行飯從容到日斜  
最愛過橋垂柳樹  
一溪新水照藤花

題張賓公采芝山堂

童稚相看有鬢華  
杖藜隔歲訪山家  
野風吹斷碧谿水  
林鳥啄殘紅杏花  
田舍初開缸面酒  
江船將到雨前茶  
卜鄰未果平生約  
慙愧東陵學種瓜

長白雜詩八首同賓公作

書堂道中

山勢圍黃鵠書堂望處孤行勝逐禪侶荷蓀問樵夫鳥道捫參井人煙倏有無入雲鐘梵近失喜一相呼

書堂

香界諸天外心知開士家雙林圍石壁十丈落藤花叢樹環平野浮嵐到海涯希文留古井先試趙州茶

石梁

窈窕度魚梁紫紺一水長臨流多白石列坐復垂楊歷歷禽魚影蕭蕭蘭杜芳鷄鳴在何處小塢出

松篁

葛家洞

長嘯發孤煙一聲高柳蟬山風吹斷續水石答潺  
湲魚鳥真濠濮雲林亦市廛都籃碧溪側隨意煮  
清泉嘯音有  
高柳蟬

柳菴

溪行路不極溪上出香林一夜前山雨千迴石瀨  
深空花春漠漠仙梵午沈沈舊識栴檀味還能悅  
衆心

柳菴西方丈夜坐

踏閣攀林罷閑階坐夜分木犀春半發鼻觀定中  
聞舉首見明月西峰歸片雲徘徊戀清景谿籟遠  
紛紛

黛溪

策杖尋源去靈溪一徑穿湍飛時激石花閑屢通  
泉初日光斜照文魚影倒懸他年返白社終倚黛  
溪偏

于茲仙人祠

我愛寒山好招尋白兔公還過于茲道倚徙古祠  
空碧水流春澗清猿嘯晚風傳聞駕鸞鶴來往月

明中

宿唐濟武太史志壑堂即事

新竹捎檐夜氣清忽聞山鳥報寒更單衾喚起瀟  
湘夢落月已西天未明

寄題采芝山堂

滅迹雲峰裏多年茹紫芝商顏如可作園綺是吾  
師危磴雪消處斷厓泉落時何當采三秀從汝結

茅茨

戊辰人日雪行華山下作

吾州最愛華不注白日青天卓虎牙一夜山中三

雪曉來失却青蓮花忽雷闇下流澌急華巖宮  
前雲霧遮轉憶石帆亭子畔老梅寒竹鬪橫斜

望華不注懷古

老慵便卧輿北風吹龐涼卷簾華不注時來獻青  
蒼想像易位處東南畝縱橫齊晉昔更霸往事可  
憐傷豈知婦人笑遂召四國殃華泉終古流不見  
繫車桑晚投喬木村蠟炬明空堂天低雪欲作四  
顧雲茫茫明日渡溪約早梅應破黃

都城北路作

齊州南北千峰遶中有明湖一鏡分今日雪中更

奇絕華山雲接鵲山雲

趙北口

莫問公孫事茫茫感逝波晚潮魚鼈急夜火解簾  
多大麓諸流會春風 萬乘過年年水楊柳頭白  
此關河

歸經鵲華二山間即目

山海作經首鵲山招搖之桂生其間麗麌音凡之水  
出其下祝餘四照花爛編今此鵲山勿乃是越人  
陳迹誰追攀灤水南來紓且直羅生夾岸衡蕪蕪  
隔水正望華不注疑臨玉鏡窺煙鬟是耶非耶看

不定尹邢雙照蛾眉彎被山瑩瑩不收拾黃如蒸  
栗丹砂殷七十二閘遠釣帶如棋布子交迴環柳  
花滿樹綠於染杏花點地紅斑斑始知今日已寒  
食潑火小雨回天慳濯纓湖亭好煙景春波澹淹  
去清心顏回首却望衛河北風沙莽蕩連雄關

女郎山

卧輿夢初起遙見女郎山雨過開奩鏡煙消露髻  
鬟靈祠空翠裏瑤瑟碧雲間不是崔羅什何因奉  
玉顏

滌山舖

山市依湖岸煙光晝杳冥竹欄看鴨鬪茅屋帶龍腥一水兼天白羣峰挾雨青漁舟與沙鳥來去墨

王亭

嘯園詩十二首

梭山

云是天孫梭何年化空碧蕭條松桂林晦靄幽人宅不妨折齒人長茲置巖石

漂溪

淪漂東注海濫觴乃於此一勺出雲根石流湛清泚應有遺世人枕流還洗耳

### 見山亭

張公茂蘭故居正德間京  
師語曰天下清官張茂蘭

入門不見日風動千箖箊孤亭在竹中猶傳清士  
居世無劉伯畊豈慕貂襪榆張公京師冬無繁衣遺者皆不受曰世惟劉伯畊衣可服耳竹

中字見左傳海岱清士見世說

### 長白深處

亦名君子堂

肅然萬壑深結廬最深處昔睹封禪儀今餘采樵  
路惟有漢時雲悠悠自來去長白即封禪書之肅然山

### 猗玕洞

古潭深不測石梁架岩洞中有蟄龍蟠鱗甲欲飛  
動明玕照清流幽禽時一哢

勘書閣

北齊勘書圖流傳子華作

楊子華有  
勘書圖

鬚馳邢魏流劍

珮文林閣從容四庫間何如百城樂

海燕樓

朱樓玳瑁梁春社紅襟燕年年思故巢  
涎涎會相見花動倉琅根美人起常晏

橫翠閣

高閣冠清溪雪浪相迴薄簾捲暮山晴衣露空翠  
落煙暝竹林間歸飛雙白鶴

淨友亭

斑竹已解韌翠莢復如雖虛堂受荷氣疎簾漾文  
漪風標兩公子照影時來窺

據梧山房

苕苕百尺桐孫枝露初引下有怪石供離立衆星  
墮山月下窺人嘯歌答虛牝

晚香堂

寒空正搖落衆芳一以息采采黃金花獨藉風霜  
力把酒東籬旁連山澹秋色

流觴處

次山石魚湖石魚在湖裏一曲匯空名列坐臨流

水風送酒船過鱗鱗數帆起

戲書蒲生聊齋志異卷後

姑妄言之妄聽之豆棚瓜架雨如絲料應厭作人  
間語愛聽秋墳鬼唱時

將赴

闕拜先祭酒府君新阡寫哀

己巳十一月初二日

親舍今何在孤兒涕淚深桓碑初下空宰木未成  
林無復趨庭日空違誓墓心北風吹急雪千片助

霑襟

題家書後寄兄禮吉并示兒輩

頻年共飲屠蘇酒此際相望千里餘鄉國近間三

日雪平安未達數行書伐薪汲水皆名士竹葉梅花又歲除苦憶小園風物好幸盤早已薦春蔬

題門人查夏重蘆塘放鴨圖四首

橫塘盡日雨濛濛間倚筇簪挂釣筒坐愛琉璃一千頃菱花風急胥鳧翁

鴨母船依湖水濱船頭長日飯龜尊憑誰寄謝柏  
南郡不是鶩欄教鬪人

鴨頭丸帖種魚經盡日蘆碭泛渺冥何似漁陽隨  
突騎天風齊放海東青

列仙之儒形甚臞一竿偏愛狎江湖畫師也會幽

人意不作金盆孔雀圖

題門人張力臣寫真二首

瘞鶴銘邊攜屐日羊侯祠下卸帆時吳山楚水探  
奇徧不覺秋霜點鬚絲

金石遺文太放紛摩挲千卷對爐薰白頭更訪鴻  
都學手拓陳倉石鼓文

題蔡方麓宮允寫真二首

沈香火暖護香篝走馬蘭臺露未收曉日花間鈴  
索動內人催喚撰詞頭

猶記句臚唱第時龍樓初日上果恩五年不共逢

山直披卷依然玉樹姿

題臧介子舍人濟陰玩月圖卷

三五南華月登臨迥散愁懷人漆園吏把酒庾公  
樓水與荷陂接光連玉露秋吳興未歸客應憶白

蘋洲

憶西城別墅

池北池南半竹枝疎梅照影恰臨池今年誰作林  
園主孤負花明酒釀時

題門人沈客子林屋幽居圖五首

萬頃玻瓈不受塵樓居高與太清鄰紫泉石髓儻

留得我欲因之窮左神

隱几春山似畫屏下窺玉柱接金庭禹書縱遣靈  
威守合爲幽人一啓扃

五月楊梅血色斑雲林十里畫圖間杉皮屋子青  
苔徑獨占吳王消夏灣

玉堂酒渴夢江南林屋東西路舊譜煩汝封題三  
百顆夜來霜信到黃柑

漁洋山下是吾家山北山南半種茶留得繖山方

竹杖待君風雪探梅花

棲霞寺紫峰閣前有方竹一叢子取以作杖方爾止銘之

寄題念東侍郎載酒堂

蓋頂黃茅野意存鑑湖一曲古城根疎梅亞竹臨  
官路遠水浮花過縣門上日抱琴穿略彴何人載  
酒醉宋尊春來騎馬東華道悔不從君學灌園

追和徐東癡釣臺懷古

帝業真歸赤伏符故人不作執金吾猶嫌齊國知  
男子終隱桐江學釣徒鼎足三公慎要領師中十  
載白頭鬚清風萬古嚴陵瀨知有雲臺博士無范井也

憶石帆亭寄兒凍汙四首

梅花香裏置茅亭下有蒼筤萬箇青聞道故園三

日雪與誰同聽玉瓏玲

曉玲見揚子

磬口檀心世外香  
幽姿那點壽陽妝  
祇宜霽雪明牕裏  
手搨疎花寫硬黃

仙人鸞尾何年墮  
池北池南共歲寒  
又向東華騎瘦馬  
春風先問竹平安

麥顆風爐手自烹  
林園急雪夜三更  
不知賀若今存否  
夢裏琴聲大蟹行

寄盤山拙公

盤山富蘭若近若  
一雞飛縛屣林中  
去風吹屈徇

衣

題趙松雪畫羊

三百羣中見兩頭依然禿筆掃驛騮竭來清遠吳  
興地忽憶蒼茫勒秋南渡銅駝猶戀洛西歸玉  
馬已朝周牧羝落盡蘇卿節五字河梁萬古愁

庚午新正過朱竹垞太史齋中探春緋桃諸  
花盛開賦三絕句

馬塍曾說野人家每先

去東皇管物華今歲長安

霜雪少試燈風裏見唐花

十笏如聞功德香曼殊陀利兩芬芳偶來小坐談  
空處政要天花作道場

方丈重過亦勝因散花天女正橫陳上人默坐空

諸相縱遣花飛不著身

過弘衍菴海棠已化去感懷施愚山侍讀與

愚山看花賦詩於此

十年不見謝宣城目極澄江遠恨生白首重吟枯

樹賦江潭蕉萃庚蘭成

寄題念東先生松巢

仙人樓居苦逼仄要與老鶴分松風天風蓬蓬起  
天籟寒濤萬頃生虛空仙人曲肱睡正熟馭風倏  
過扶桑東下視蓬萊玩清淺太華夜碧聞清鐘

月蝕宿都察院署贈周石公中丞

御史府中鳥欲棲滿城車馬驟春泥一星執法中  
臺峻五夜嚴更刻漏齊才盡玉川傷顧免時平越  
石厭荒雞與君十載東朝舊燈火曾分太乙藜

余與中丞  
同爲宮僚

立齋相國齋中蕉花開索賦六首

漢主初開扶荔宮甘蕉花入上林紅今朝獨樂園  
中見始信嵇舍狀最工

中書退食日蕭蕭簾捲西山爽氣饒茶白筆牀相  
對好一林花放膽瓶蕉

玉宇微涼八月中林塘香散木犀風綠天深處一

花坼蝙蝠飛來相映紅

南中紅蕉花開有紅蝠  
集中見酉陽雜俎

朱萼新抽萬卷書仙人掌露勝醍醐丹青好借黃  
筌筆更寫紅蕉水鶴圖

紅霞一抹映瓊杯照影銀塘細細開不似平泉閒  
草木猶煩驛騎日南來

木棉千樹粵江邊不及蕉花分外妍常記五羊城  
畔見一枝紅壓百花船

聞二東春雨露足喜寄諸子

故鄉冬雪後穀雨一番新園坼竹尊者星明農丈  
人縣官初給復田畯屢班春何事東華道朝朝望

麌塵

送謝方山假歸德州

廿載爲郎少宦情五言真屬謝宣城人如白雪風  
流遠草如青袍日夜生飛蓋西園誰故舊送君南  
浦又清明名家韋杜天元近休疊陽關第四聲

三月十二日拜御史中丞赴暢春園謝

恩作

西山曉翠望觚稜五載田園倏見徵右掖一星明  
執法南臺六察領中丞清時袞職將何補昨夢瀛  
洲已倦登霄漢承恩頻忝竊新銜還是一條冰

戲簡汪鈍翁四絕句

已未作久刪去偶見鈍老刻集載見答詩因追錄存之

穎水箕山傲昔賢金庭玉室隔人煙逃名却被山  
英笑兩字堯峰世已傳

談經人比鄭公鄉絲竹門生列後堂爲奉侏儒一  
囊粟山中閑煞東修羊

陽山山外好煙波可惜柴門掩薜蘿莫怪山人高  
價賣此中佳處本來多

吳中高士謝山靈共指文星傍帝廷今夜堯峰  
高處望不知何處少微星

浮梁令介初兄輓詩

諱臨元聊城人順治辛丑進士甲寅殉節贈江西按察司僉事

傳烽連岳麓羣盜逼杉關抗節冰霜裏捐驅豺虎  
閒黃巾何日盡白馬不生還惟有啼鵝血春來返  
故山

送徐勝力官諭典試貴州兼寄田綸霞中丞  
百戰曾經馬伏波送君五月下牂牁祠過帝女逢  
班竹洞入秦人訪綠蘿已見華風開瘴癘須令樂  
職備中和田郎久別應無恙共倚南樓一嘯歌

五月初七日雨中瀛臺啓事

極目紅欄綠浪兼之細雨斜風一幅吳淞煙雨只

少天隨釣篷

初八日晴入瀛臺再成

日照駢娑宮外風來魚藻池邊沙上水禽偶語橋頭人柳三眠

董起男送風雨梅戲占爲謝

故友御史  
玉虹子

吳中五月梅黃雨想像千林舶趠風珍重遺來香軟齒不須將醋沁曹公

題門人查德尹雲林畫軸二首

平生不作王門客莫把倪迂配米顛最憶推篷寫松石菰蒲秋雨熟龍涎

曾上神嵩眺雒陽碧伊清洛迥蒼蒼怪來舒卷煙

雲滿得自盧鴻舊草堂

畫爲登封詹學耿先生物德  
尹遊嵩山往謁攝以爲贈云

答陳元孝寄懷之作

不見閉門陳正字嶺雲江樹五年餘秋風欲下華  
陽館粵客纔通尺素書蒲澗紅泉應不改羅浮翠  
羽夢全疎天南耆舊今頭白珍重新詩獨起予

題門人喬無功餉烏圖

烏亞亞引弓射引弓射傷老鳥毛羽拉雜尾畢逋  
鳥生八九子坪茶口卒瘞端坐桂樹間鷹隼來睢  
盱精衛銜木石其志一何愚或言此鳥亦非愚精  
識動天憫羈孤白日迴光照幽仄一朝能使烏頭白

題徐藝初寫真

風流好事兼文雅三百年來顧阿瑛知爾前身是  
金粟玉山重占草堂名

題周文矩五王避暑圖爲李奉倩中丞

聞道開元日宸遊花萼同恩深五王宅一作帳敕借九

成宮竹映翠微合泉飛金澗通披圖見隆準負矣

讓皇風

趙仲符宮贊書來云秋雨霏足山泉四溢臨

流坐石日誦莊騷賦寄三首

名泉秋谷口泉水入門流一夜南溪雨千巖瀑布

秋雲山初過雁簾閣似浮鷗挂壁松枝塵何人解

獻酬

讀書坐懷古未遣世人知被髮聞鸞鳴嘯彈琴咏雉  
噫逍遙羨蒙叟憔悴感湘靈各有清芬在君應自  
得師

林居常晏起蒼翠撲晴牕自富五千卷何勞四十  
雙采芝綺里季作黍漢陰龐晚節思鄰並還能倒  
玉缸

小憩高梁橋

昔日高梁道綺羅嬌上春依然挑菜渚不見采蘭

人新水生魚纈輕絲漾麴塵不妨成漫興青草正  
如茵

赴暢春園 起居再過高梁橋

祓禊來春暮軒車復此過西風一蕭瑟秋水正微  
波 黃屋雲中近青山苑外多今朝封事暇聊自  
飲亡何

送金會公太史歸廣濟兼寄開先顥公二首  
破額山前水依然碧玉流吾廬真可愛此外復何  
求名已高三館歸還讀九丘蘋花何處采遙送木  
蘭舟

三  
齋屋詩卷一  
十八  
廬岳天邊影千峰恰對門舊遊時入夢君到必窮  
源雪後康王谷花時陶令村遠公相憶處共聽一  
聲猿

喜彭羨門閣學卜鄰之作

小小論交三十載中間離合似浮雲谷風莫問窮  
兼達舊雨猶存我共君東閣從容多密劄南臺潦  
倒怒彈文望衡乍喜相鄰並可許談詩坐夜分

寄懷尤悔菴太史四首

歸田身更健重築遂初堂宋尤文簡公堂名悔菴始祖也名預耆英會  
心空選佛塲卷簾看鄧尉倚杖濯滄浪畫作屏風

樣何妨遠寄將

白詩云便是屏風樣又云兼聞好事者畫我作屏風

令子初休沐趨庭樂事多書名王大令詩格小東坡真誥通仙籍名經禮佛陀銅坑梅信早定擬百回過

何必買山隱翛然居士家華亭丹頂鶴甫里白蓮花船遞中冷水僧分顧渚茶筆牀將釣具隨意泊汀沙

早歲已研京新羅識姓名老如袁伯業鄉即鄭康成束筍文千軸秋霜髮數莖高堂吹笛罷教授幾門生

爲彭訪濂侍講題尊公雲客讀書圖

別君三十載把臂此圖中自著潛夫論人傳河上  
公依稀逢墮履復長髮見方瞳欲問華陽館松聲日  
暮空

先生信道甚篤余  
與定交在癸巳年

題姜西溟洞庭秋望圖

君家剡溪西爲復剡溪東王謝昔居剡千秋緬遺  
蹤我往欲就君名山懷剡中幾載京國遊素心王  
謝同君忽泛五湖仙壇訪毛公徑披笠澤雲蓑笠  
青濛濛萬頃白銀灣倒浸七十峰拂袖縹渺巔五  
州羅心胷脚踏巨鼈背目送孤飛鴻人言秋興逸

況臨水精宮湖霜熟黃甘林煙染丹楓落日迴漁  
舟蘆中收釣筒欲呼天隨子兼挾鷗夷翁茲遊信  
清曠愧我羈樊籠他年剡溪歸相期喚樵風

帶經堂集卷五十三

帶經堂集卷五十四

歙門人程哲校編

新城王士禛貽上

贊蠶尾詩二

米海嶽研山歌爲朱竹垞賦

海嶽研山不可見人間空說研山圖研山之圖亦遭燬雲煙過眼徒嗟吁宣和艮嶽已塵劫矧乃片石輕鎔銖永嘉流落幾百載昭陵玉匣今亦無詎知神物有呵護星芒夜隕三天都舊藏許文穆家太平宰相盛文物寶此何啻千璠璵古藤書屋花未放主人愛客招吾徒眼中突兀忽見此乍疑几席羅衡巫

壺中九華那足擬仇池枉用誇穎蘇三茅地肺互  
鉤帶二華雲氣相紫紆蛟龍屈蟠待雷雨仙靈髡  
髮迴輶車華蓋一峰獨秀拔宛插玉笏翹犀株翠  
巒玉筍左右列睢尻股脚相攷扶上洞下洞闕曲  
折潛通小有涵空虛龍池幽窈驗雨候頗疑中有  
驪龍珠峰獨者蜀屬者嶧上泉有埒下有瀼座客  
摩杪三歎息蒼然古色生眉鬚海嶽之菴書畫舫  
幾伴此老浮江湖巧偷豪奪歷千劫閱盡春秋如  
蟪蛄翰林好事過顛米日餐蛾綠忘飢劬滄江夜  
夜虹貫月莫令光怪驚菰蘆

再題研山絕句示竹垞

南唐寶石劫灰餘長與幽人伴著書青峭數峰無  
恙在不須淚滴玉蟾蜍元章詩研山不可見或詩徒歎息惟有玉蟾蜍向余頻淚滴青峰數峰南唐元宗語

題李梅崖僉事讀書處

幽花覆徑竹捎檐讀易先生畫下簾鶴柴曉開苔  
面破魚苗春漲水痕添胸中磊落五千字架上縱  
橫三萬籤黃鶴山邊戴顚宅鄉心猶遙數峰尖

得門人陝陽守衛凡夫書却寄

曲沃文清公子

鄭國煩才子青春擁傳車沔江帶城郭峩岳到庭  
除京兆三年別沱潛一紙書相門清白後無忝謝

卷之二  
羅居

僻郡凋殘甚遺聞昔有徵漢歌留上堵唐蹟在房  
陵讀史應懷古憂民獨撫膺爾墨書二千石早晚看  
飛騰

門人朱悔人入都即往天津寄懷

秋色重陽晚寒空木葉聞相逢何草草別思已紛  
紛海氣津門雨鴻聲楚澤雲誰憐棄繩者猶是舊  
終軍

題河梁圖送門人俞蒼文歸雲間

秋氣晚冥冥歸帆挂潞亭五茸紅葉樹三泖白蘋

汀去路日已遠流波無暫停西山如送客不改舊時青

題門人魏禹平水村圖四首

天邊如黛九峰青一曲分湖望渺冥賸客不來苔滿徑日修蟹志補魚經

水紅花發一叢叢翡翠雙飛西復東好與吳興鬪清遠道人合住水晶宮

草閣前臨大小洄銀絲鱠縷助行杯偶然小試垂竿手正得鱸魚四十枚

寫得江南水竹村煙波萬疊護柴門又魚射鴨閒

家具我亦思歸夢陸渾

題朱竹垞雪景寫真四首

天女長空散六花疎枝冷蕊鬪橫斜小身幻出維  
摩影費我連朝玉畫叉

雪後谿山畫不如梅花林外跨青驥相逢莫笑酸  
寒甚曾較華林七錄書

雪屋寒林斷晚煙板橋流水尚濺濺不逢才子安  
鴻漸定是襄陽孟浩然

風急天山雪打圍下韞鷹疾掠空飛誰知驢背江  
南客手拗寒香插帽歸

題竹垞小長蘆圖卷三首

史筆高三館歸心戀五湖分明鰯菜好寫出小長蘆

膝上佳兒文度眼中秋色江村歸路不須扶杖笑

凭桐孫稻孫

太史二孫名

一蓑一笠日相隨不似官人似釣師七字愛吟揚  
處士亂堆漁舍晚晴時

十一月二十八日雪懷天章伸符

趙生梁甫北吳子中條陰兩地懷人遠連朝積雪  
深黃河遶蒲坂紅葉滿荊岑欲鼓幽蘭曲何人是

賞音

雪中再寄仲符宮贊二絕句

遙指天孫碧落東北來山色雪空濛美人家在峨  
嵋嶺一片空青海綠中

雪滿西山玉不如捲簾萬笏到堦除兔園賓客今  
餘幾起對梅花欲寄書

家書至知女端於十月初九日已葬哭之五

首

明明橫磨劍割我父女恩遙持萬古淚送汝青楓  
根

左家嬌女詩陳王金瓠辭忘情非太上萬古一銜

悲

此詩成頗自疑癸酉  
秋女宮又卒殆識云

荒花已半落松風還夕清系河南去路從此隔幽

明

京洛逢初雪花如柳絮飛謝庭無道韞腸斷向寒

暉

滄海明珠失驚風蕙草枯系河一曲水應喚女墳

湖

謝盤山拙公惠芝

寄我靈芝車馬形萬年松下斲青冥菟絲聞道垂

千尺更欲從師乞茯苓

送方位齋出守登州

齊煙青九點東北盡之罘雪霽燕市天晴見蜃  
樓風流今玉局貢錯古東牟定上蓬萊閣忘機下

海鷗

再答拙菴禪師惠芝

寄書已十載見面亦何遲忽有山中信來當歲暮  
時欲尋清淨退更訪人天師不遇商顏叟何因茹

紫芝

冬日出部署戲作

西樞慚愧握兵符五十形容壯歲徂殘雪一簾牕

日晚姬人學鑷白鬚鬢

兵部督捕署在西故稱西樞

戲作示內

追錄順治丙申舊作

少年潦倒一愁無今日朱顏攬鏡殊解說羅敷夫

婿好鬟鬟何似使君鬢

六朝人謂蘊藉爲潦倒

冬杪門人李蒼存送盆花奉答

雪後唐花取次開憶君獨酌盡深杯雨花小劫恩  
恩過好問文殊師利來

較盤山志竟寄拙菴禪師

選佛場非遠青溝講席開常言行脚去何日打包

來彌勒同龕處英雄舞劍臺薊門春樹裏東望興

悠哉

盤山有李衡公舞劍臺

題羨門閣學采藥圖

秦駐山中采藥歸銀魚挂辟夢依稀羨君攜得驂  
鸞侷霧鬢風鬟未葉衣

招梅定九并題寫真

梅精律曆著中西算學通

齊人漫說談天衍漢代虛傳洛下閑欲向百泉聞  
絕學小車花下待先生

奉

命典會試二月初六日 賦宴禮部

郎官列宿記當年重到南宮尺五天滿座金貂霄  
漢上幾叢羅綺舞筵前八公相鶴希真賞一代登  
龍愧昔賢弱歲計偕今白首承恩還憶舊青囊

闡中作

一半青春在鎖闡韶華客思兩依依燕知社日逡  
巡到花滿春城歷亂飛敢謂進賢蒙上賞只思沽  
酒解朝衣檐牙曉日聞靈鵠檢點宮花御苑歸

放榜

銀燭青煙徹曉明曙鴉聲散九重城高風鶻鶚扶  
搖起春水魚龍變化生仙掌凌空干氣象湘靈鼓

瑟擅才名書生報國從今始取次煙霄第一程

辛未榜後荅梅耦長見投

東坡與方叔千古爲咨嗟如何古戰場亦復失李  
華絕足不見知終使困鹽車東風朝夕來愁見長  
安花

題李叔則寫真

腰腹驚看似伯仁鬚眉彷彿見河濱寄言江左夷  
吾輩定可容渠數百人

送張寶菴宰新野

牽絲雖百里湯沐古南陽白水清官舍青山落印

牀人祠銅馬帝城倚卧龍岡遙憶絃歌處風流楚

塞長

送門人李伯舍郎中出守都勻六韻

作郡向炎方雲山古夜郎三苗殊漢俗五尺啓秦  
疆銅鼓祠諸葛蘆笙賽竹王蘿茆開瘴雨蕙苡綴  
蠻粧掉尾多盧鹿編毗半紫姜文翁能化蜀不用  
薄淮陽

聞越王臺重建七層樓寄陳元孝屈翁山梁

藥亭

昔登奧臺上不見七層樓空憶扶胥外南溟天盡

頭憑虛起飛觀流目極炎州安得凌風翼真同汗漫遊

送劉君宰建德

送者自崖返君真建德遊桐廬最蕭灑水木況清秋橘柚紛千樹漁商聚一州新安江見底應憶古羊裘

送侯介藩宰興安

秋渡三湘水春遊八桂林驟鸞徵古蹟迴鴈寄鄉心乳洞應無恙石湖有興安乳洞三嚴詩陶碑想陸沈山谷有陶尚翁碑在興安到來紅豆蔻花滿訟庭陰

出塞

紫塞鑾輿度黃旂輦路開名王紛玉帛天步動  
風雷日逐稱藩入呼韓稽穎來軍中朱鷺曲聲震  
白龍堆

保和殿大學士兵部尚書蒼巖梁公輓詞四首

當寧咨元老儒林仰大賢晚聞司馬相未及潞公  
年東觀留餘論公嘗書畫古器鑒別最精南陽表賜阡平生商出處  
端藉史臣傳

儒雅開文苑風流亦我師豈知台象坼真兆哲人

三  
二  
一  
萎蕉葉銀鉤字棠村錦瑟詞

蕉林棠村皆公所居  
公詩詞書翰並工妙

平泉多

草木金粟但餘碑

大農持節日萬里昔曾經忠信開蠻瘴安危繫使  
星越人罷黃屋漢德播滄溟銅柱今無恙他時好  
勒銘

遲暮開黃閣孤卿閱黑頭文章忠獻後

韓忠獻云某爲  
相永叔爲學士

天下文章  
莫大乎是風度曲江儔道大消朋黨歸全絕悔尤雕

丘杏花坼何路哭西州

答拙老寄盤山圖

三生支許最相關未得相尋水石閒應笑羣提舊

居士祇從圖畫說盤山

題汪孝子子喻寫真

一望愁雲龍上低年年社日草萋萋  
翁中宰木知何限夜夜慈烏繞樹啼

太子太傅文華殿大學士刑部尚書謚文毅

易齋馮公輓詞

斟酌調元氣從容秉化鈞青山休沐日黃髮老成  
人祖帳君恩重綸扉直道伸公在政府屢有直  
言深蒙嘉納

不忝碑版照麒麟

東門人陳藹公於昊天寺

重來依老衲蘭若倚西城白日一何速青山無世  
情冢中王輔嗣林下古先生好共蟬連語寧論世  
上名昔同愚山侍讀奉訪於此已十三年寺旁多古冢故戲及

十月朔 親祭 太廟是夜雪

烝嘗崇 九廟雲物麗層霄 三后神靈遠中天  
陟降遙 至尊思肸蠁列侍肅金貂六出豐年喜  
先迎 御仗飄初三日小雪

棟亭詩曹工部索賦

孤亭思舊德歲歲棟花風澆用千牛乳來從五柞  
宮甘棠終憶召大樹尚留馮手澤勞封殖無忘賦

角弓

送門人陸次公判撫州兼寄牧仲中丞

青門一尊酒言祖謝臨川人憶貝丘別鴈隨彭蠡  
船高齋逢霽雪春思入江煙爲向中丞問吟鬢白  
幾年

退朝雪中懷拙菴禪師

東望盤山三百里年年結束負行縢偶逢金水橋  
頭雪忽憶梅花樹下僧鉢裏伊蒲常施鳥巖中瀑布  
布幾成冰丈夫一事公無讓未許尋常將相能

唐崔有省

趙公問徑山道欽禪師弟子出家得否欽曰  
出家乃大丈夫事非將相之所能爲崔有省

過梁家園憶宋荔裳按察昔邀梁蒼巖龔芝麓二先生與予兄弟汎舟於此頗有唱和時諸公及先兄西樵皆歿

此地足煙水當年幾溯游故人皆宿草衰柳又驚秋門冷鯉鼯竄霜寒鴈鶩愁永懷川上歎逝者竟悠悠

題梅爾止太僕洗桐圖因贈

卜築昭亭山下居山中風物近何如歌成朱汗徠天馬夢憶琴溪跨鯉魚東觀至今留諫草北樓他日問藏書雲林清閟應無恙坐對孤桐百尺餘

題畫龍虎同官兵部侍郎席珠公索賦二首

神龍穿山張鬢髻煙霧出沒鱗之而奔騰四海水  
皆立黯澹九天雲下垂何人妙筆追董羽雷車砰  
訇震天鼓飛廉屏翳紛後先直上長空作霖雨

空林白日風怒號千崖落木如驚濤於菟據地正  
憑怒青兕黃熊皆遁逃太平有道麟在藪玉虎般  
般樂君固空山藜藿歸去來不避豪賢亦何有

聞滕王閣落成寄宋二牧仲開府

中丞持節鎮洪州滕閣重開勝庾樓清簾疎簾過  
暮雨隱囊紗帽對江鷗曾來弭棹悲殘劫虛擬題

詩到上頭安得乘風度彭蠡與君吹笛坐滄洲

子乙  
丑過

南昌閣  
燬於火

柳

雨態煙姿定有無柔條依舊暗金鋪風情合讓鍾  
山隱手寫黃羅付慶奴

遙題牧仲煙江疊嶂堂在北蘭寺

東湖勝事擬西湖幻出煙江疊嶂圖也似東坡在  
龍井不知曾有辨才無

題王石谷畫送竹垞歸禾中二首

漁浦樵風望欲無煙波一幅小長蘆明年禹穴添

奇事更寫名山入剡圖

西清載筆十三年清切長依尺五天回首玉堂春  
夢醒何妨有錄續歸田

題李貞孟少司空寫真二首

纔聞歸院撤金蓮又見臺烏報夕遷上殿自關天下計朝來封事萬人傳

梁苑風流雅不羣侍郎彩筆更能軍早聞唱第蓬

萊殿日下驚看五色雲

韓忠獻公唱名第二太史奏  
五色雲見先生名第適如之

送門人高念祖遊大名

宋烈武王瓊之裔

澶淵懷古處猶識衛王功將相同心日華戎一氣

中衣冠南渡遠鎖鑰北門雄祖德君能述芳芳繼

謝公

相謂寇忠愍公

題張敦復大宗伯賜金園圖

我昔曾過龍眠山山雪蒼茫歲方晏龍眠山莊知

有無空向圖中幾回見遺墟但指璇源館

在舒城亦伯時別業

芒鞚未踏垂雲汎

見樂城集

祇今彈指越七載過眼流光

等飛電龍眠尚書早致身玉斧森沈侍清燕承

恩暫許休沐歸朱提賜出蓬萊殿鑑湖一曲落公

手草木雲嵐荷深眷數問家金供賓客遺事蘭陵

何足羨三年却返承明廬夢寐家山寫東絹溪流

百曲學印文山色千層累重巔龍公鸞尾嘯煙雨  
鹿角鼠鬚飽霜霰峴崿忽斷漁浦開仰見雲中瀉  
飛練草堂抱膝還讀書樂此長年可忘倦此山此  
圖世稀有終擬他年追勝蹟待公功成歸故山江  
帆特乞樵風便

送姚綏仲編修歸省因寄羹湖二首

歲晚龍眠路曾過竹葉亭簷當千箇綠苔蘚一簾  
青韋氏傳經學荀家有聚星因君煩問訊計日慰  
趨庭

再憶城南飲籃輿到泳園梅花橫石磽風雪啓衡

門妙畫樽前作新詩燭下論玉河折楊柳逸興已

飛翻

甲子冬奉使東粵過桐城羹湖欲留余竹葉亭度歲不果作畫賦詩相送泳園羹湖別業在南郭山上

寄題齊河王氏園

清濟來王屋東流遶祝阿閑園傍隈隩曲徑隱煙蘿野曠山容合亭空水事多當年會盟地今日有漁蓑

送同官人岳大司農賑關中

鶴首神臯古雍州年來雲漢厪宸旒輓輸西湊

襄陽道

襄究陸運

河漕南通底柱流

江淮水運

三輔耕耘看漸復

二陵風雨莫深憂司農持節臨關內早爲蒼生借

一籌

和趙仲符宮贊寄門人洪昉思絕句

趙詩云垂堂  
高坐本難安

身外鴻毛擲一官獨抱焦桐  
俯流水哀音還爲董庭蘭

七條絲裏賞音難自拭龍脣玉軫寒君是開元房  
太尉一生留得董庭蘭

門人汪于鼎寄始信峰草堂志

避地何方好天邊始信峰人歸散花塢徑度擾龍  
松向下雲煙積當門澗壑重此中猿鳥絕無路識  
行蹤

送吳商志之大梁二首

夢華何處是  
鬟鬟舊東京  
蜀洛人誰在  
登臨自不平  
堂曾傳萼綠壘  
尚指青城流恨  
金明水春波日夜生

金梁橋上望依舊  
月如霜法曲傳宮伎  
流風說憲王中原飽戎馬  
世事幾滄桑且可酣醇酒  
忘情錦瑟旁

題門人袁士旦寫真

一童子  
捧劍侍

寶劍千金直  
平生一諾存  
曾過朱亥市  
屢入信陵門  
未俗多遊俠  
窮途尚報恩  
試聽石城曲  
家世本

諸袁

烏目山人歌贈王石谷

翬

我聞慧車子昔居烏目山淳于從之受虹景一朝  
拂袖升天關仙蹤窅渺幾千載惟見烏目山色高  
辱顏烏目山人有仙骨早年嘯傲煙霞窟白頭不  
識豪貴門林卧蕭然謝巾襪有時潑墨何淋漓人  
道前身應畫師胸中五嶽起方寸落筆萬象爭神  
奇寸縫尺素走荒裔江神欲奪蛟龍知疑君古人  
乃並世昨來忽貽十幅無聲詩或仿營丘或洪谷  
或摹黃鶴或大癡偶與吳興鬪清遠白蘋碧浪迴  
煙姿深黃淺絳妙點綴吳筆項墨窮毫釐更聞應

詔大同殿

重瞳一顧親嗟咨  
荔蘆中人乃有此

何不高議金華爲君言掉頭且歸去尚湖秋老羹  
尊絲山中仙人待已久怪我遊戲還山遲他日相  
思訪烏目慧車有約同遨嬉

題崇福寺壁

陳孺人權  
厝此寺

淚盡縷金衣流連掩總幃但留奩具在無復佩環  
歸一徑空花落雙林忍草稀中宵仙梵寂形影是

耶非

得同年張蔚生郡丞書

美人佐郡古涼州書札緘題慰四愁宛馬如雲頻

入塞玉關何日罷  
防秋唐家都護安  
西府漢史功名博  
望侯幕下即聞多  
薦達參軍未必久淹留

石谷與門人合寫西堂詩思見贈題其上

谿流過雨決決鳴天風環珮來琮琤谿邊山色自  
太古嶺上白雲非世情疎簾清簟晝無暑翠竹碧  
梧時有聲此中幽意少人會起坐彈琴山月明

題焚琴煮鶴圖

丹頂青田鶴朱絲綠綺琴希聲傳靜夜清唳警疎  
林忍付庖丁手寧論爨下音惟將廣陵散一弔九

臯禽

送楚雲禪師歸棲霞

將赴江西壽昌之請

優曇纔一現飛錫遠人間又向紅泉去何時白下  
還家風傳洞上詩句似寒山寄語明僧紹多年約

閉關

子遊攝山三十年矣

爲門人王令詒題松南柳磯圖二首

西風圓泖薦新涼黃柳稀疎鴈帶霜開卷相看似  
相識釣魚船上謝三郎

楊柳依依水四圍垂竿不爲鱖魚肥蟹船萬里扶

南水回首松南舊釣磯

時赴粵東茂名令

悼亡詩十二首

哭陳孺人及女宮作

優鉢曇花現即空那堪搖落委殘紅招魂欲問魂  
何處冷雨淒風野寺中

十七年來憶別家任城雲樹即天涯接藍一道南  
池水爭忍重歌陌上花

乘願無姻莫斷腸相從浩劫禮空王三生補塔因  
緣在知是金光是飲光

秋社經年燕燕歸今年春社事全非後堂寂寂簾  
垂地何處紅襟上下飛

今年梁  
燕不至

博山香篆倚銀屏三體唐詩梵字經髻方鬟紅牕人  
未寢燈前教誦雨淋鈴

孺人修梵行又喜唐絕句予口授百首皆成誦雨淋鈴夜却歸秦一篇所常謳詠也

銀箭金壺聽麗譙年年空負可憐宵拋殘斗帳紅  
蕤枕手點茶湯候早朝

枕壓偏鬟久罷梳綠牕畫寂掩流蘇那堪亭午朝  
回後日聽垂簾響藥爐

耿耿銀河夜有霜玉堦露草覆寒螿橋南荀令無  
情思堅坐空庭爲取涼

荀奉倩事見世說

新粧不愛桃蘇髻半臂全無柿蒂綾祇有桓家荆  
布在一回瞥見一沾膺

花謝東風月墮雲蘅蕪香歇幾時聞縱然月沒教  
星替何許相逢李少君

十齡嬌女伴泉臺猶記啼聲繡褓催今日斜陽蕭  
寺裏西風吹送紙錢財

阿宮附  
晉僧舍

濃香銷歇掩空幃剩有羅巾印口脂只似雲車還  
入洛魚山深鎖智瓊祠

文華殿大學士吏部尚書謚文襄鄴園李公

輓詞四首

烽傳閩嶠日屢及寢門時四海方多壘三衢首誓  
師令嚴司馬法人覩漢官儀忠義平生志皇天后

土知

結用李薦祭  
蘇文忠公語

書生矜燕領萬里取通侯列戍紛江介諸軍望節

樓挽彊朝射虎饗士夜椎牛莫訝頭須白功名百戰收

曳履上星辰中樞及統均勲庸釐秬鬯圖畫照麒麟淮蔡鐃歌入元和雅樂新沙堤聞築處開閣佇功臣

角巾東第去一棹直沽風絲竹隨安石林園待潞公神騎箕尾立望與斗杓同家世西平舊重論社稷功

題牧仲中丞述鹿軒詩卷二首

七十二峰充下陳漁洋一點具區濱胸吞雲夢君

何有却對漁洋憶故人

中丞有<sub>望漁</sub>  
洋見懷之作

燕寢凝香畫戟枝放衙花底鶴相隨愛君五字風  
流甚實有文章替左司

白樂天詩敢有  
文章替左司

寄答余澹心

甲子使粵澹心附子  
及鄭山公司寇南行

江東耆舊盡無恙浣花翁龍腹名誰及蛾眉老愈  
工瀛滄千里道風雪一樽同書帶今零落翻令憶

鄭公

吾鄉  
鬱山有司寇書  
帶草時鄭公新歿

甲戌除夕前二日雪集姜西溟吳商志門人

蔣京少查夏重宋山言周策銘殷彥來分

賦得錢思公

雪下度轅轅煙中望伊水逶迤林壑間皓然見千里車馬渡水來云傳府公旨駛雪宜山行小住爲佳耳迴眺二室雲蒼茫半空裏俯聆八節灘潺湲漱寒齒丞相解憐才洛中盛文士風流映古今千載猶興起

五月望日京少山言彥來靜山邀過崇效寺

訪雪塢法師看棗花同賦

祇園棗花時招攜共遊散鬢驂旗檀林吹香綠陰滿射覆叱來來樂府歌纂纂樂此憺忘歸林中夕陽緩

王謝居東日頗愛支道林亦有鴈門僧宗雷共招  
尋我來空寂舍一契山水心復有二三子清言滌  
煩襟遞捉玉麈柄流憩青松陰何必噪縣遊而憶  
廬山岑

題將樂令范生錢公殉難錄後

王華山水窟僊令有遺祠羣盜憑城日孤臣授命  
時平生酬馬革英爽颯雲旗峴首千秋石應刊第

二碑

帶經堂集卷五十四